

uembre apres s'estre faueuz de diuers hazards. Ils y trouuerent le Pere Brebeuf qu'ils cherchoient, & qui les receust dans nostre maison, & prit le soin de leur instruction & nourriture assisté puiffamment des liberalitez de Monsieur le Gouverneur qui n'espargne rien en semblables actions, comme aussi de celle de Monsieur de Chamflour qui commande au Fort & habitation des trois Riuieres, & mesme des reuerendes Meres Hospitalieres, qui estendent bien souuent leur charité hors de l'enceinte de leur Hospital, particulièrement en faueur des Hurons.

Incontinent apres leur arriüée: ils s'appliquerent à apprendre les prieres, & le Catechisme, avec vn ardeur qui ne pouuoit prouenir que du sainct [147] Esprit, les plus auancez aydoient les plus reculez, & ceux qui estoient plus ignorans reconnoissoient volontiers les plus sçauans pour leur maistres: ils passoiient dans ces commencemens la meilleure partie de la nuit à dire, & repeter continuellement ce qu'ils auoient appris pendant la iournée, l'vn deux qui auoit l'esprit plus grossier, & la memoire moins heureuse que les autres defesperoit quasi au commencement de pouuoir rien apprendre, neantmoins aydé de la grace de Dieu, & encouragé par les paroles du Pere, & par les bons exemples & discours de ses compagnons, il perseuera si heureusement à se faire instruire qu'il apprit non seulement les prieres & le Catechisme, mais encore plusieurs autres choses non sans vn grand estonnement de soy-mesme. Ils assistoient tous les Dimanches au Catechisme qu'on faisoit aux François en la Chappelle, & bien qu'il fussent assez aagez, il auoient neantmoins vne singuliere satisfaction de respondre publiquement de ce qu'ils auoient appris